



**CONVENIO DE COLABORACIÓN CULTURAL ENTRE A CONSELLERÍA DE CULTURA,
EDUCACIÓN E ORDENACIÓN UNIVERSITARIA DA XUNTA DE GALICIA E O CONCELLO DE
CURTIS PARA A DOTACIÓN DE EQUIPAMENTO E MELLORA DAS INSTALACIÓNS NO
EDIFICIO DE USOS MÚLTIPLES EN TEIXEIRO**

En Santiago de Compostela, na sede dos servizos centrais da Consellería de Cultura,
Educación e Ordenación Universitaria, 17 de agosto de 2016.

REÚNENSE:

Dunha parte, _____, actuando en representación da Xunta de Galicia, en virtude do seu cargo de conselleiro de Cultura, Educación e Ordenación Universitaria, para o que foi nomeado polo Decreto 15/2015, do 9 de febreiro de 2015, no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa Presidencia e o artigo 2 da Resolución do 8 de abril de 1991, pola que se publica o acordo do Consello da Xunta de Galicia do 27 de marzo de 1991.

Doutra, _____, na súa calidade de alcalde do Concello de Curtis, con CIF P-1503200F actuando en nome e representación da entidade, segundo as facultades que lle outorgan os seus estatutos, tal como figuran nos arquivos desta consellería.

Ámbalas partes teñen plena capacidade para levaren adiante este convenio e,

MANIFESTAN:

Que ámbalas entidades son conscientes da necesidade de instalacións de carácter sociocultural que permitan unha adecuada oferta, co obxecto de satisfacer as necesidades que nesta materia teñen os habitantes desa zona.



Que a Xunta de Galicia ten atribuídas funcións en materia de fomento da cultura, de acordo co establecido no artigo 27.19º do Estatuto de Autonomía, en consonancia co estipulado no artigo 148.1º.17ª da Constitución Española.

A Consellería de Cultura, Educación e Ordenación Universitaria quere acometer a realización de actividades de promoción e divulgación do patrimonio e da cultura galega. Mediante a programación das actuacións de recuperación da nosa cultura preténdese acadar unha maior eficacia na consecución destes obxectivos, por medio do desenvolvemento de actividades culturais e de fomento da cultura en lingua galega.

A Consellería de Cultura, Educación e Ordenación Universitaria pretende defender e promocionar os valores culturais do pobo galego, actuando no fomento e promoción da cultura, e na protección, conservación e difusión do patrimonio cultural; dentro da programación anual que fai, a consellería traza as directrices a seguir dentro do mapa de infraestruturas socioculturais de Galicia.

Con este convenio asegurámonos de ter, dentro das nosas posibilidades, os espazos necesarios para que poidan representarse as diversas manifestacións da cultura galega nun marco digno e adecuado ás necesidades reais dos nosos tempos.

A Consellería de Cultura, Educación e Ordenación Universitaria ten especial interese no acondicionamento de infraestruturas de carácter sociocultural existentes pero que non se atopan en condicións óptimas para o seu uso, para que as distintas entidades de Galicia poidan ofrecer á poboación unha oferta sociocultural axeitada e adecuada en base a unha programación feita polas entidades, e aprobada, en definitiva, pola consellería; deste xeito inténtase conseguir unha implicación por parte da sociedade galega.

A colaboración decídese en base a criterios obxectivos tales como a poboación beneficiaria deste tipo de infraestruturas, non dispor de locais axeitados, implicación por parte da entidade no desenvolvemento de actividades culturais, remate e acondicionamento de infraestruturas existentes, contar cun plan de actuación en canto ás



actividades socioculturais a desenvolver por parte da entidade, dispor dos medios económicos e técnicos precisos para facer fronte á inversión destas características, dado que o pago se realiza unha vez que a entidade asume o custo da inversión.

O Concello de Curtis conta con dous núcleos urbanos (Curtis e Teixeiro) nos que se realizan a maior parte de actividades culturais do Concello. Concretamente en Teixeiro está o Edificio de Usos Múltiples no que cabida gran número de actividades de diversa índole, xa que este local é usado por distintas asociacións e o Concello. Neste local orgánzanse actividades como o Nadal Cultural, baile de salón, celebración da Semana Cultural de Teixeiro etc. Por todo isto se pretende mellorar as instalacións dos dous bloques que conforman o conxunto do Edificio de Usos Múltiples.

A magnitude das actuacións, que sería similar á posta en funcionamento dun novo centro bibliotecario fai que a súa situación sexa similar ao acontecido coas bibliotecas de Mondariz e Lalín e o importe da axuda da orde de subvencións para equipamentos tramitada pola Secretaría Xeral de Cultura deixaría o edificio de usos múltiples do Concello de Curtis nunha situación de desvantaxe en relación as bibliotecas de Mondariz, Lalín e ás demais entidades que participen na concorrência competitiva.

De acordo co artigo 26 da Lei de Subvencións non é posible promover a concorrência pública para a realización desta actividade, pola necesidade de atender áreas específicas como a que acontece co Edificio de Usos Múltiples en Teixeiro, único con estas características que necesita do acondicionamento necesario para poder ofrecer un servizo permanente durante todo o ano á poboación do concello e tamén a usuarios de concellos limítrofes; para elo cómpre realizar as actuacións necesarias que permitan ofrecer, por parte das distintas entidades, uns servizos ben planificados dos que debemos responsabilizarnos, para garantir a todos os cidadáns a igualdade de oportunidades no acceso ó uso das fontes de coñecemento e da cultura.



Por todo o anterior é o Concello de Curtis o que posúe a especificidade como beneficiario así como a da actuación subvencionada e o interese social da axuda concedida.

Por isto, para acadar unha maior eficacia na execución de actuacións, dado o interese común das partes asinantes, que teñen intereses coincidentes, é polo que asinan este convenio de colaboración, de acordo coas seguintes,

CLÁUSULAS

PRIMEIRA.- O obxecto do presente convenio é establecer as condicións básicas para a colaboración entre a Consellería de Cultura, Educación e Ordenación Universitaria e o concello de Curtis para a dotación de equipamento e mellora das instalacións para a realización de actividades no Edificio de Usos Múltiples en Teixeira.

A Consellería de Cultura, Educación e Ordenación Universitaria entregará a cantidade de 35.000 € para adquisición do equipamento necesario para o Edificio de Usos Múltiples.

Coa realización destas actuacións o Concello de Curtis pode ofrecer un servizo axeitado a toda a poboación. Dispor dun edificio de usos múltiples no concello nunhas condicións óptimas para o seu uso por todos os cidadáns é a mellor forma de ofertar un servizo público do que debemos responsabilizarnos.

A achega da Consellería de Cultura, Educación e Ordenación Universitaria é compatible coa percepción doutras subvencións, axudas, ingresos ou recursos para a mesma finalidade, procedentes de calquera administración ou entes públicos ou privados, estatais, da Unión Europea ou de organismos internacionais. O importe das subvencións en ningún caso poderá ser de tal contía que illadamente ou en concorrencia con outras subvencións, axudas, ingresos ou recursos, supere o custo da actividade subvencionada. Esta cantidade, 35.000 €, trátase dun importe certo, quedando por conta do beneficiario a diferenza de financiamento necesario para a total execución da actividade subvencionada, debendo ser reintegrado o financiamento público unicamente no caso e



polo importe que supere o custo total e real da actividade, segundo o establecido no artigo 21.2 do Regulamento de subvencións de Galicia.

A achega da Consellería de Cultura, Educación e Ordenación Universitaria, 35.000 €, librarase con cargo á aplicación orzamentaria 10.20.432B.760.0, código de proxecto 2015 00370.

SEGUNDA.- O Concello de Curtis comprométese, pola súa parte, a facer constar en toda a publicidade que xeren estas actividades –tanto impresa como audiovisual- a colaboración Xunta de Galicia, para o que utilizará a normativa da imaxe corporativa da Xunta de Galicia. Así mesmo comprométese ao cumprimento das obrigas contidas na Lei 9/2007, do 13 de xuño, de subvencións de Galicia e en especial as recollidas no artigo 11 desta norma. Tamén será de aplicación o establecido no Decreto 11/2009, do 8 de xaneiro, en canto non se opoña á lexislación anterior. Con carácter supletorio, será de aplicación o disposto na Lei 38/2003 xeral de subvencións e no seu regulamento, aprobado polo Real Decreto 887/2006, do 21 de xullo.

Os beneficiarios deberán dar cumprimento as obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

O beneficiario ten a obriga de prestar colaboración e facilitar tanta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma e ao Consello de Contas.

TERCEIRA.- A Consellería de Cultura, Educación e Ordenación Universitaria comprométese a aboar o Concello de Curtis a cantidade de 35.000,00 €, con cargo á aplicación orzamentaria 10.20.432B.760.0 dos orzamentos xerais da Comunidade Autónoma de Galicia para o ano 2016, código de proxecto 2015 00370.

En aplicación do Decreto 193/2011, do 6 de outubro, pola que se regulan especialidades nas subvencións ás entidades locais galegas, a Consellería de Cultura, Educación e



Ordenación Universitaria poderá efectuar pagos anticipados, que suporán a entrega de fondos con carácter previo á xustificación, ata un importe máximo de 28.000 €. O pagamento restante, 7.000 €, pagarase no momento da completa xustificación polo concello do cumprimento da finalidade e demais condicións establecidas no convenio.

A Consellería de Cultura, Educación e Ordenación Universitaria, efectuará o libramento dos fondos por importe total de 35.000 € contra a presentación da seguinte documentación:

- Facturas expedidas polas empresas adxudicatarias dos traballos relacionados co obxecto deste convenio achegando xunto coas mesmas o comprobante de pago efectuado e certificacións ou calquera outro documento con validez xurídica que permita a acreditación do cumprimento da finalidade da subvención. Entregarase copia compulsada desta documentación.
- Certificado do responsable da entidade en materia económica, que transcriba o acordo ou resolución pola que se aproban os gastos realizados e de que os traballos se realizaron na súa totalidade e de conformidade co obxecto deste convenio.
- Declaración do conxunto de axudas, tanto solicitadas como recibidas, para a actividade obxecto deste convenio. Anexo II do convenio.
- Acta de recepción por parte do concello, do subministro.
- Declaración responsable do órgano competente da entidade, de estar ao día no cumprimento das obrigas tributarias ou fronte á Seguridade Social e de non ter pendente de pagamento ningunha outra débeda coa Administración pública da Comunidade Autónoma. Esta declaración será comprensiva do cumprimento de obrigas por reintegro de subvencións (Anexo I).
- Declaración responsable de titularidade da conta bancaria (Anexo III).

A data límite de presentación da referida documentación de xustificación do gasto, establécese no día 30 de novembro de 2016.

Estas actuacións estarán sometidas á comprobación explícita da súa realización por parte dos servizos técnicos da Xunta de Galicia



Segundo o establecido no artigo 4 do decreto 193/2011, é necesario que o Concello de Curtis cumpra co deber de remisión ao Consello de Contas das contas xerais de cada exercicio.

De conformidade co previsto na Lei 9/2007, de subvencións de Galicia, para efectos desta xustificación consideraranse os gastos realizados durante o ano 2016, dende o 1 de xaneiro ata a data tope de xustificación da axuda, que respondan á natureza da actividade subvencionada.

No caso de que o concello concerte con terceiros a execución total ou parcial da actividade obxecto do convenio, estarase ao disposto no artigo 27 da Lei 9/2007, de 13 de xuño, de Subvencións de Galicia e no Real Decreto Legislativo 3/2011 do 14 de novembro polo que se aproba o texto refundido da Lei de Contratos do Sector Público.

O artigo 65.1 do Decreto 11/2009 polo que se aproba o Regulamento da Lei 9/2007 de 13 de xuño de subvencións de Galicia establece que os beneficiarios están obrigados á constitución de garantías cando estea prevista a posibilidade de realizar pagamentos á conta ou anticipados, non obstante, segundo o apartado 4 do devandito artigo, exonera de constitución de garantía, entre outros, as administracións públicas.

CUARTA.- O Concello de Curtis deberá presentar declaración responsable, para proceder á sinatura do convenio e despois para o seu pagamento, de estar ao día no cumprimento das obrigas tributarias e fronte á seguridade social e de non ter pendente de pagamento ningunha outra débeda coa administración pública da comunidade autónoma, segundo o establecido no artigo 10 da lei 9/2007 de subvencións de Galicia e no artigo 11 do decreto 11/2009, polo que se aproba o regulamento da Lei 9/2007 de subvencións de Galicia. Anexo I do convenio.

A sinatura deste convenio implica, de ser o caso, a autorización á Consellería de Cultura, Educación e Ordenación Universitaria para solicitar as certificacións acreditativas de que se atopa ao corrente das obrigas tributarias estatais e autonómica e da seguridade social, así como que non ten pendente de pagamento ningunha outra débeda, por ningún concepto coa Administración pública da Comunidade Autónoma de Galicia, de acordo co



establecido na Lei Orgánica 15/1999, de 13 de decembro, de protección de datos de carácter persoal, disposición adicional cuarta da Lei 40/1998, de 9 de decembro, do imposto sobre a renda das persoas físicas e outras normas tributarias, e demais disposicións de aplicación.

QUINTA.- O Concello de Curtis comprométese a destinar os fondos percibidos ao obxecto concreto para o que foron concedidos. A Consellería de Cultura, Educación e Ordenación Universitaria poderá comprobar, cando o considere pertinente, a execución das actividades obxecto deste convenio.

SEXTA.- Créase unha comisión mixta de seguimento para aclarar as dúbidas derivadas da interpretación e execución deste convenio, formada polo secretario xeral de Cultura, da Consellería de Cultura, Educación e Ordenación Universitaria, e polo alcalde do Concello de Curtis

SÉTIMA.- O incumprimento de calquera das cláusulas deste convenio constituirá causa suficiente para a súa rescisión, e así mesmo procederá o reintegro da subvención cando concorra algunha das causas previstas no artigo 33 da Lei 9/2007, de 13 de xuño, de subvencións de Galicia.

OITAVA.- A Consellería de Cultura, Educación e Ordenación Universitaria cumprirá coas obrigas específicas de información de convenios de conformidade co disposto no artigo 15 da Lei 1/2016 de 18 de xaneiro, de transparencia e bo goberno.

De acordo co establecido no artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa, que introduciu diversas modificacións na Lei 38/2003, do 17 de novembro, xeral de subvencións, o contido deste convenio será publicado na Base de Datos Nacional de Subvencións, nos termos recollidos no artigo 20 da Lei 38/2003, do 17 de novembro, xeral



de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

Así mesmo, será obxecto de publicidade no Rexistro de Axudas, Subvencións e Convenios, ao abeiro do disposto no decreto 126/2006, do 20 de xullo e no decreto 132/2006, do 27 de xullo.

NOVENA.- Este convenio ten natureza administrativa. A xurisdición contencioso-administrativa será a competente para o coñecemento de posibles cuestións litixiosas que poidan suscitarse como consecuencia del.

DÉCIMA- O período de vixencia deste convenio será dende a súa sinatura e ata o 31 de decembro de 2016, sen prexuízo de que as actividades subvencionadas sexan as realizadas a partires do 1 de xaneiro de 2016.

Este convenio obriga ás partes que o asinan ao seu cumprimento, e ambas as dúas sométense ao acordado en tódalas estipulacións. Esténdese en duplicado exemplar, no lugar e data arriba indicados.

O conselleiro de Cultura, Educación e Ordenación Universitaria e O alcalde do Concello de Curtis



XUNTA DE GALICIA

CONSELLERÍA DE CULTURA, EDUCACIÓN
E ORDENACIÓN UNIVERSITARIA
Secretaría Xeral de Cultura

 galicia